



Seminar Sukan Universiti ASEAN Bincang Jadikan Universiti Pusat Pembangunan Sukan Unggul



Datuk Ir. Idris Haron, (dua dari kiri) sedang berbual mesra dengan panel forum Seminar Sukan ASEAN di Hotel Equatorial, Bangi.

SERDANG, 12 Dis – Akademi Sukan Universiti Putra Malaysia (UPM) telah mengadakan Seminar Sukan Universiti ASEAN 2008 untuk bertukar maklumat dengan peneraju sukan di universiti ASEAN bagi menjadikan universiti sebagai pusat pembangunan sukan yang unggul.

Pengarahnya Prof. Madya Dr. Aminuddin Yusof berkata seminar itu yang dibuat sempena Sukan Universiti ASEAN ke-14 (SUA) 2008 yang berlangsung dari 11 hingga 22 Disember ini berkongsi pengalaman dan penyelidikan hala tuju dan dasar sukan negara melahirkan atlet universiti berprestasi tinggi yang bertaraf dunia.

"Seminar ini melibatkan seramai 100 delegasi tempatan dan 30 delegasi negara ASEAN di kalangan ahli akademik, penyelidik, jurulatih, pengurus, pelatih dan atlet sukan yang akan bertukar maklumat untuk memartabatkan sukan berprestasi tinggi," katanya.

Seminar yang diadakan kerjasama Kementerian Pengajian Tinggi telah disempurnakan penutupannya oleh Timbalan Menteri Pengajian Tinggi Datuk Ir. Idris Haron di Hotel Equatorial, Bangi pada hari yang sama.

Beliau berkata pada tahun ini ASEAN University Sports Council telah memberi penghormatan kepada Malaysia untuk menganjurkan seminar itu yang bertajuk 'Peranan Universiti dalam Pembangunan Sukan Negara'.

Katanya panel forum yang terlibat ialah Presiden Persatuan Pendidikan Jasmani, Sains Sukan, Kesihatan dan Kecergasan Malaysia, Prof. Dato' Dr. Leonard Andrew de Vries, Prof. Dr. Sombat Karnjanakit dari Chulalongkorn University, Thailand, Prof. Madya Gilda Uy dari University of Philippines Diliman, Quezon City dan Prof. Madya Dr. Muhammad Nazrul Hakim Abdullah dari Akademi Sukan UPM.

Ucapan seminar disampaikan oleh penyelidik pembangunan sukan antarabangsa Dr. Anthony Blackshaw dari Sheffield Hallam University, United Kingdom.

Disediakan oleh Seksyen Media, Bahagian Komunikasi Korporat UPM.